

〔先哲叢談續編四〕阿部將翁○中略

將翁蓋以慶安三年庚寅生於奧州盛岡寬文中初到江戶又到京及大坂漫遊數年而還鄉延寶中嘗欲乘漕運貨物之船再到大坂南部八戶洋颶風大作漂流海中殆七閱月艱苦萬狀不可殫言柁裂桅碎薪水皆盡自分必死無知所向飄搖出沒遂著阿馬港其地近廣東即海外諸州商船所輻湊也土人憐之傳送廣東竟到兩浙間後托之互市商船護送長崎得還焉將翁在於杭州始學醫術專心本草歸鄉之後益講習之辨別物品凡係藥餌者精覈研究莫不盡意設有未詳之者則到崎舉質諸於清客蘭人之有識者不得其旨則不措故其所講習皆得之實驗矣○下

〔皇國名醫傳後編中〕阿部將翁○中略

阿部照任通稱友之進號將翁南部人少時乘漕船赴江戶遇颶漂到清國止於福建十八年得本草學歸居江戶享保中幕府求通知本草者或薦照任乃辟使采藥於東海北陸諸州三至蝦夷以勞賜俸及宅更給地於城東植養藥種照任前後所得物品甚夥至石藥尤多前人所未道者其在甲州得黃芩以進時舶載黃芩真物絕少先是照任弟子植村某通稱信濃大掾奉幕府命赴長崎鑒定藥品會寧波商齋黃芩數十萬斤某排衆議辨斥其偽幕府命却之於是德廟德川吉宗謂國產黃芩延喜式所未載而照任始得之其功偉矣且足以破西商之姦矣乃命送之長崎使清客米來頻視之來頻嘆異焉公因厚賜照任又得大附子於蝦夷公皆種之藥園朝鮮人參種法亦自照任發焉清商嘗獻貝母栽公令諸醫徧視莫有知者乃摘三葉盛以竹筒使人就問照任曰是爲貝母郭璞所謂白華葉似韭者爲最上品世所稀見也嘗於相州雨降山世稱大山觀神庫有一小石如玉主僧傳爲秘寶而不識其爲何照任曰是鮓答也以祈雨必有驗主僧喜時適大旱即取試之俄而雷雨大起及辨甲州金峯所出石莖非水晶其精鑿博識率是類也時京師有遠藤元理諳悉藥性頗負時譽著本草辨疑論和漢諸藥精粗真偽及古今有無照任指謫其誤繆玄理聞而大服遂來執贄云